

品名之十

其品

太公利於齊止于莊旅王人成運有入謂曰

聖王不與齊國者也太公誤起則齊侯有難者

以其忠誠也


魯桓公將江田而西門公博也魯桓公不

謂也其後伐魯及之江人黃人主是所經公力

有公孫氏與公孫氏同家而公孫氏與公孫氏

黃氏之盟與黃氏之盟江人黃人主是所經公力

也



智品卷之十

樊維嚴

具品

太公封於齊止于逆旅主人晨起有一人謂曰客寢甚甘殆非就國者也太公蹶起卽路俄有追者至以其出關遂止

齊桓公時江國黃國小國也在江淮之間近楚楚大國也數侵伐欲滅取之江人黃人患楚齊桓公方存亾繼絕救危扶傾尊周室攘夷狄爲陽穀之會貫澤之盟與諸侯將伐楚江人黃人慕桓公之義來會盟于貫澤管仲曰江黃遠齊而近楚楚爲利

之國也若伐而不能救無以宗諸侯不可受也桓公不聽遂與之盟管仲死楚人伐江滅黃桓公不能救君子閔之是後桓公信壞德衰諸侯不附遂陵遲不能復興夫仁智之謀卽事有漸力所不能救未可以受其質桓公受之過也管仲可謂善謀矣詩云曾是莫聽大命以傾此之謂也

昔徐偃王好行仁義陸地之朝者三十二國王孫厲謂楚莊王曰王不伐徐必反朝徐王曰偃王有道之君也好行仁義不可伐王孫厲曰臣聞之大之與小強之與弱也猶石之投卵虎之啗豚又何疑

焉且夫爲文而不能達其德爲武而不能任其力
亂莫大焉楚王曰善乃舉兵而伐徐遂滅之

趙主父使李疵視中山可攻不也還報曰中山可伐
也君不亟伐將後齊燕主父曰何如可攻李疵對
曰其君見好巖穴之士所傾蓋與車以見窮閭隘
巷之士以數十伉禮下布衣之士以百數矣君曰
以子言論是賢君也安可攻疵曰不然夫好顯巖
穴之士而朝之則戰士怠于行陣上尊學者下士
居朝則農夫惰於田戰士怠於行者則兵弱也農
夫惰於田者則國貧也兵弱于敵國貧于內而不

亾者未之有也伐之不亦可乎主父曰善舉兵而伐中山遂滅之

初虞叔有玉虞公求旃弗獻旣而悔之曰周諺有之曰匹夫無罪懷璧其罪吾焉用此其以賈害也乃獻之又求其寶劍叔曰是無厭也無厭將及我遂伐虞公故虞公出奔共池

越與吳戰于會稽不勝范蠡爲吳所虜後吳放歸越饋吳粟十萬斛范蠡盡蒸之以與吳言粟好且付民種種不生吳五年因飢越乃伐吳

吳赤市使於智氏假道於衛甯文子具紵絺三百製

將以送之大夫豹曰吳雖大國也不壤交假之
則亦敬矣又何禮焉甯文子不聽遂致之吳赤市
至於智氏既得事將歸吳智伯命造舟爲梁吳赤
市曰吾聞之天子濟于水造舟爲梁諸侯維舟爲
梁大夫方舟方舟臣之職也且敬太甚必有故使
人視之視則用兵在後矣將以襲衛吳赤市曰衛
假吾道而厚贈我我見難而不告是與爲謀也稱
疾而畱使人告衛衛人警戒智伯聞之乃止

趙使毅諒至秦秦王曰趙豹平原君數欺寡人趙能
殺此二人則可毅諒曰趙豹平原君親寡君之母

弟也猶大王之有葉陽涇陽君也大王以孝治聞
於天下衣服之便於體膳啗之嫌於口未嘗不分
於葉陽涇陽君葉陽君涇陽君之車馬衣服無非
大王之服御者今使臣受大王之令以還報敝邑
之君畏懼不敢不行無乃傷葉陽君涇陽君之心
乎秦王曰諾

趙高既弑二世便立二世之兄子公子嬰爲秦王以
黔首葬二世令子嬰齋當廟見受玉璽齋五日子
嬰與其子工入謀曰丞相高殺二世恐羣臣誅之
乃佯以義立我聞趙高乃與楚約滅秦宗室而王

關中今使我齋見廟此欲因廟中殺我我稱病不行丞相必自來來則殺之高使人請子嬰數輩子嬰不行高果自往曰宗廟重事王奈何不行子嬰遂刺殺高於齋宮夷高三族以徇

漢宣帝遣使徵龔遂議曹王生願從功曹以爲王生素嗜酒亡節度不可使遂不忍逆從至京師王生日飲酒不視太守會遂引入宮王生醉從後呼曰明府且止願有所白遂還問其故王生日天子卽問君何以治渤海君不可有所陳對宜曰皆聖主之德非小臣之力也遂受其言旣至前上果問以

治狀遂對如王生言天子說其讓笑曰君安得長者之言而稱之遂因前曰臣非知此乃臣議曹教戒臣也上以遂年老不任公卿拜爲水衡都尉議曹王生爲水衡丞以褒顯遂云

光武趣駕南轅晨夜不敢入城邑舍食道傍至饒陽官屬皆乏食光武乃自稱邯鄲使者入傳舍傳吏方進食從者飢爭奪之傳吏疑其詐乃椎鼓給言邯鄲將軍至光武升車欲馳旣而徐還坐曰請將軍入久乃駕去晨夜兼行

董卓之初入長安也步騎不過三千自嫌兵少恐不

爲遠近所服率四五日輒夜潛出軍近營明日乃
大陳旌鼓而還以爲西兵復至

并州刺史高幹袁紹甥也素貴有名招致四方遊士
士多歸附仲長統過幹幹善遇之訪以時事統謂
幹曰君有雄志而無雄才好士而不能擇人所以
爲君深戒也幹雅自多不納其言無几以并州叛
至於敗

安定太守母丘興將之官操戒之曰羌胡欲與中通
自當遣人來慎勿遣人往善人難得必將教羌胡
妄有所請求因欲以自利不從便爲失異俗意從

之則無益於事興至官果遣校尉范凌往羌中凌
果教羌使自請爲屬國都尉操曰吾預知當爾非
聖也但更事多耳

曹公出濡須吳王水軍拒守數挑戰不出乃爲牋與
曹公曰孤居江南舟楫爲業魚鱉爲侶三世於茲
自謂於上國可幸無罪乃辱丞相暴師江滸敝邑
雖小帶甲數萬戰艦万艘丞相遠來孤敢不待然
竊料北方平野車騎得施任丞相縱橫所在得志
丞相但見北方之利而不見南方之害舍車騎而
爭於舟楫之間非計之得也虎豹撼山震嶽而以

之攀木傳枝越險登峻則不如猿猱何者非其所
長也今相拒不遠丞相試觀吾部武孤率文身之
衆鼓陽侯之波出沒烟雲之中上下風濤之內孤
恐丞相不能竟觀而罷也春水方溢丞相宜急退
恐有載胥之禍噬臍無及孤亦願丞相來來必不
還丞相以梟雄之姿居金馬之地爲苦天下丞相
不歿孤終不安然竊謂丞相長於料事必不拙於
用短也敢因下吏緣佈腹心公得賤語諸將曰孫
權不欺孤乃撤軍還

先主一見馬超以爲平西將軍封都亭候超見先主

待之厚也。濶畧無上下禮與先主言常呼其字關羽怒請殺之先主曰人窮來歸我卿等怒以呼我字故而殺之何以示於天下且孟超兼資文武雄烈過人當與黥彭之徒並驅爭先卿等願勿復言張飛曰如是當示之以禮不然拔劍擊柱殆將不止明日大會諸將軍畢集請超入羽飛並挾刀立直超顧坐席不見羽飛見其直也乃大驚遂更不復呼先主字明日歎曰我今日乃知其所以敗爲呼入主字幾爲髯公所殺自後乃尊事先主益州草創翼德一言而上下有制消英雄跋扈之心君

子謂翼德於是乎知禮

張惠恕至蜀諸葛武侯甚知之及聞惠恕黜免未得其故思之數日曰吾今已了矣其人於清濁太明善惡太分

諸葛恪有才名吳主欲試以事令守節度節度掌錢穀文書繁猥非其好也武侯聞之遺陸公書曰吾兄老而恪性疎今使典主糧穀糧穀軍之要最僕雖在遠竊用不安足下特爲啟至尊轉之陸公以白吳主卽轉恪領兵恪得兵輒自喜啟吳主曰丹陽山險民多果勁雖前發兵徒得外縣平民而已

其餘深遠莫能禽盡恪請往爲其守三年可得甲士四萬朝議皆以爲丹陽地勢險阻周旋數千里山谷萬重其幽邃民人未嘗入城邑對長吏皆伏兵野逸白首於林莽逋亡宿惡咸共逃竄鑄山爲甲兵俗好武習戰高氣尚力其升山赴險抵突叢林若魚之走淵後狄之騰木也時觀開隙出爲寇盜每致兵征伐尋其窟藏戰則擒至敗則烏竄自前世以來不能馭而羈也恪父聞之歎曰恪不大興吾家將大赤吾族也恪固言其必捷吳主拜恪丹陽太守恪至府乃移書四部屬城長吏令各保

其疆界明立部伍其從化平民悉令屯居乃分內
諸將羅兵幽阻但繕藩籬不與交鋒候其穀熟輒
縱兵芟刈使無遺種舊穀旣盡新田不收平民屯
居略無所得於是山民飢窮漸出降首恪乃復勅
下曰山民去惡從化皆當撫慰徙出外縣不得嫌
疑有所執拘長吏胡伉獲降民周遺遺舊惡民困
迫暫出內圖叛逆伉縛送言府恪以伉違教遂斬
以徇民間伉坐戮知官惟欲出之而已於是老幼
相携而出歲期入數皆如本規吳主嘉其功遣尚
書僕射薛琮勞軍琮書頌恪曰山越恃阻不賓歷

世緩則首鼠急則狼顧皇帝赫然命將西征神策
內授武師外震兵不染鍔甲不沾汗元惡旣梟種
類歸義蕩滌山藪獻戎十萬野無遺寇邑罔殘姦
旣掃兇惡又充軍用藜藿稂莠化爲善草魍魎魍
魎更成虎士雖國家威靈之所加實元帥臨履之
所致也雖詩美執訊易嘉折首周之方叔漢之衛
霍豈足以談功軼古人勲超前世主上歡然遙用
歎息特遣中臺近官迎致犒賜以旌茂功以慰劬
勞拜恪威北將軍封都鄉侯子喻聞之大息曰是
恪不幸而成功也吾老矣不見其敗吾墓木其伐

孫

孫琳既廢亮遣使迎瑯琊王王初聞意疑不敢行使者具述琳等所以奉迎本意遂發行至曲阿有老公千王叩頭曰願殿下速行無疑也大皇帝以神武之畧奮三千之卒割據江南席卷交廣開拓洪業祚之萬世南州之民戴孫氏之日久矣晚節衰老廢長立少少主輕躁志大謀踈大將軍因而廢之然大將軍既能廢之豈難自爲之知群臣百姓不與也故決計迎殿下殿下親大皇帝子賢孝有聞今日之立非殿下而誰昔漢文帝由代入漢宋

昌勸其速行正類今日若更自疑阻事久變生天下喁喁未可知也但殿下即位之後恐煩聖慮殿下有漢文之德大將軍無絳灌之忠此在殿下徐圖之非臣所能逆料也王善之王就乘輿琳以千人迎於半野王甚恐懼遂謀圖大將軍矣

武陵部從事樊佗誘導諸夷國以武陵屬劉主群臣請以萬人討之弗聽特召問潘濬以爲五千兵往可禽佗吳主曰卿奈何輕之甚也濬曰佗是南陽舊姓頗能弄唇吻而實無辦幹之才臣所以知之者佗昔嘗爲州人設饌比至日中食不可得而十

餘自起此亦侏儒觀一節之驗也吳主大笑而納其言卽遣濬將五千人往果斬平之濬語曰吾有以報拭面之恩矣

陸遜與諸葛瑾攻襄陽遜遣韓扁齎表奉報還遇敵於沔中鈔邏得扁瑾聞之甚懼書與遜云大駕已旋賊得韓扁具知吾濶狹且水乾宜當急去遜未答方催人種葑豆與諸將奕棋射戲如常瑾曰伯言多智其當有以自來見遜遜曰賊知大駕已旋無所復感得專力於吾矣又已守要害之處兵衆意動且當自定以安之施設變術然後出耳今便

示退賊當謂吾怖仍來相蹙必敗之勢也乃令瑾督舟船遜悉上兵馬以向襄陽敵素憚遜遽還赴城瑾便引舟出遜徐整部伍張拓聲勢步趨船敵不敢逼

晉武帝初登阼探策以卜世數多少而得一帝不悅群臣失色莫有言者裴楷正容儀和其聲氣從容進曰臣聞天得一以清地得一以寧王侯得一以爲天下貞武帝大悅群臣皆稱萬歲

愍懷太子少便聰慧武帝甚愛之六七歲時宮中嘗夜失火武帝登樓望之太子牽上衣裾使入閭中

上問其故太子對曰暮夜倉卒宜備非常不宜親
近火光令照見人主

楊駿將誅其黨左軍將軍劉豫陳兵在門遇裴頠問
太傅所在頠給之曰向於西掖門遇公乘素車從
二人西出矣豫曰吾何之頠曰宜至廷尉豫從頠
言遂委而去

張華爲惠帝朝太子太傅值楚王瑋稱受密詔殺太
宰汝南王亮太保衛瓘等內外兵擾朝廷大恐華
白帝曰瑋矯詔擅害三公將士倉卒謂是國家之
意故從之耳今可遣騶虞幡使外軍解嚴理必風

靡上從之瑋兵果敗

賈后謀廢太子左衛率劉卞甚爲太子所信遇每會宴卞必預焉屢見賈謐驕傲太子恨之形於言色謐亦不能平卞以賈后謀問華華曰不聞卞曰卞以寒悴自須昌小吏受公成拔以至今日士感知此是以盡言而公更有疑於卞邪華曰假令有此君欲如何卞曰東宮俊又如林四率精兵萬人公若阿衡之任若得公命皇太子因朝入錄尚書事廢賈后於金墉城兩黃門力耳華曰今天子當陽太子人子也吾又不受阿衡之命忽相與行此是

無其君父而以不孝示天下也雖能有成猶不免
罪况權戚滿朝威柄不一而可以安乎

惠帝之爲太子也朝臣咸謂純質不能親政事權每
欲陳啟廢之而未敢發後會宴陵雲臺權託醉因
跪帝牀前曰臣欲有所啟帝曰公所言何耶權欲
言而止者三因以手撫牀曰此座可惜帝意乃悟
因謬曰公真大醉耶權於此不復有言

裴楷在晉惠時慮內難未已求出外鎮除安南將軍
假節都督荊州諸軍事垂當發而楚王瑋果矯詔
誅太保魏瓘太宰亮并密遣討楷楷素知瑋有望

於已聞有變單車入城匿於妻父王渾家與亮小子一夜入徙故得免難

庾太尉與蘇峻戰敗率左右十餘人乘小船四奔亂兵相剝掠射誤中施工應絃而倒舉船上咸失色分散亮不動容徐曰此手那可使箸賊衆廼安

司馬承行達武昌釋戎備見王敦敦與之宴欲觀其意謂承曰大王雅素佳士恐非將帥才也承曰公未見知耳鈐刀豈不能一割乎承以敦欲測其情故發此言敦果謂承曰彼不知懼而學壯語此足知其不武何能爲也聽者一鎮

胤爲江州刺史會有詔徵後將軍郭默爲右將軍
默樂爲邊將不願宿衛以情懇于胤胤曰此非小
人之所及也默由是怨胤時百官無祿惟資江州
而胤商販繼路爲有司所奏書下胤不卽歸罪猶
自申理有謂郭默曰劉江州密有異圖將不利於
郭侯默遂帥其徒襲胤傳首京師導梟胤首於大
航以默爲江州刺史陶侃聞之投袂起曰此必詐
也卽將兵討之且與導書曰默殺方州卽用爲方
州害宰相便爲宰相乎導乃收胤首答侃書曰默
據上流之勢加有船艦成資故包含容忍以候足

下豈非遵養時晦以定大事者邪

王丞相拜揚州賓客數百人並加霑接人人有說色
唯有臨海一客姓任及數胡人爲未洽公因便還
到過任邊云君去臨海便無復人任大喜悅因過
胡人前彈指云蘭闍蘭闍群胡同笑四坐並懽

周伯仁母冬至舉酒賜三子曰吾本謂渡江托足無
所爾家有相爾等並羅列吾前復何憂周嵩起長
跪而泣曰不如阿母言伯仁爲人志大而才短名
重而識闇好乘人之弊此非自全之道嵩性狠抗
亦不容于世惟阿奴碌碌當在阿母目下耳

愍度道人始欲過江與一僧道人爲侶謀曰用舊義
往江東恐不辨得食便共立心無義旣而此道人
不成渡愍度果講義積年後有僧人來先道人寄
語云爲我致意愍度無義那可立治此計權救飢
爾無爲遂負如來也

劉琨在晉陽嘗爲虜騎所圍城中窘迫琨乃乘月登
樓清嘯賊聞之皆悽然長嘆中夜奏胡茄賊又流
涕歔歔有懷土之思向曉復吹賊並棄圍而走

簡文帝嘗與桓溫及武陵王晞同載遊版橋溫遽令
鳴鼓吹角車馳卒奔欲觀其所爲晞大恐求下車

而帝安然無懼色溫由此憚服

宣武移鎮南州制街衢平直人謂王東亭曰丞相初
營建康無所因承而制置紆曲方此爲劣東亭曰
此丞相乃所以爲巧江左地促不如中國若使阡
陌條暘則一覽而盡故紆餘委曲若不可測

郗司空在北府桓宣武惡其居兵權郗於事機素暗
遣戕詣桓方欲共獎王室修復園陵世子嘉賓出
行於道上聞信至急取屣視竟寸寸毀裂便回還
更作屣自陳老病不堪人間欲乞閑地自養宣武
得屣大喜即詔轉公督五郡會稽太守

西公哀帝母弟也卽位六年桓溫誣帝在藩夙有
痿疾嬖人朱靈寶等參侍內寢而二美人田氏孟
氏生三男長欲封樹時人惑之因諷崇德太后下
令廢變爲海西縣公徙居吳縣十一月妖賊許龍
晨到門稱太后密詔奉迎帝帝曰我得罪於此幸
蒙寬宥且太后有詔便應官屬來何獨使汝也汝
必爲亂因叱左右縛之龍懼而走帝知天命不可
再深慮及禍乃杜塞聰明終日酣暢耽于內寵有
子不育時人憐之朝廷以帝安于屈辱不復爲虞
庾亮以望重地逼出鎮于外南蠻校尉陶稱間說亮

當舉兵內向或勸王導密爲之防導曰吾與元規
休戚是同悠悠之論宜絕知者之口即如君言元
規若來吾便角巾還第復何懼哉又與稱書以爲
庾公帝之元舅宜善事之於是讒間遂息

初郗超黨於桓氏以父愔忠於王室不令知之及病
甚出一箱書授門生曰我死後若以哀悼害寢食
者可呈此超卒愔果成疾門生呈箱皆與桓溫往
返密計愔大怒遂不復哭

桓南郡好獵每田狩車騎甚盛五六十里中旌旗蔽
隰騁良馬馳擊若飛雙甄所指不避陵壑或行陳

不整磨亮騰逸參佐無不被繫東桓道恭玄之族也時爲賊曹叅軍頗敢直言常自帶絳綿繩着腰中玄問此何爲答曰公獵好縛人士會當被縛手不能堪芒也玄自此小差

宋孝武嘗與顏師伯樗蒲帝擲得雉大悅師伯後擲得盧帝失色師伯遽斂子曰幾作盧師伯爾日一輸百萬

李崇都督江西諸路時有定州流人解慶賓兄弟坐事徙揚州弟思安背役亡歸慶賓欲規絕名貫乃認城外死尸詐稱其弟爲軍兵李蓋等所殺有女

巫楊氏自誣云見鬼稱說思安被害甚苦崇疑之
密遣二人非州內所識者僞從外來詣慶賓告曰
僕在北州比有一人見過寄宿夜中共語疑其有
異便即詰問乃云是流兵背役解某我兄慶賓見
住揚州相國城內脫矜愍爲我往告我兄必重相
謝且勿送官也慶賓見說悵然失色故求少停此
人具報崇崇一鞠卽伏

慕容紹宗以鉄騎五千夾擊侯景景誑其衆曰汝家
屬已爲高澄所殺衆信之紹宗遙呼曰汝家屬並
完若歸官勲如舊景士卒不樂南渡遂大潰景與

數騎濟淮晝夜兼行追軍不敢逼使謂紹宗曰曷
若就擒公復何用紹宗乃縱之

范雲齊建元初竟陵王子良爲會稽太守雲爲主簿
王未之知後尅日登秦望山乃命雲雲以山上有
秦始皇刻石此文三句一韻人多作兩句讀之並
不得韻又皆大篆人多不識乃夜取史記讀之令
上口明日登山子良命賓僚讀之皆茫然不識末
問雲雲曰下官嘗讀史記見此刻石文進乃讀之
如流子良大悅以爲上賓自是寵冠府朝

謝康樂父不慧早亡康樂好臧否人物叔混患之欲

加裁抑未有方也謂宣遠曰非汝莫能乃與晦躍
弘微等共遊戲命贍與靈運共車旣上便商較人
物宣遠謂之曰秘書早亡談者亦互有同異靈運
默然言論自此衰止

齊文襄疑文宣佯愚慮其有後變將陰圖之以問崔
暹暹曰官與二郎俱在行位試以手板拍其背而
不瞋乃將犀手板換暹竹者自楷拭而翫視之以
是知其實癡不足慮也帝旣鑒暹責其往者打背
暹自陳所對文襄之言明已功以贖死帝悟曰我
免禍乃暹之力釋而勞之

謝晦每以朝廷密事語其兄瞻瞻輒向親舊說以爲
戲笑以絕其言

高歡疾篤澄詐爲歡書以召景先是景與歡約曰今
握兵在遠人易爲詐所賜書皆請加微點至是景
得書無點辭不至

韋孝寬爲雍州刺史先是路側一里置一土堠經雨
輒毀孝寬臨州勤部內當堠處但植槐樹旣免修
復又便行旅宇文泰後見之嘆曰豈得一州獨爾
於是令諸州夾道一里種一樹十里種三樹百里
種五樹焉

爾朱兆入洛陽擒莊帝崩于晉陽建明二年長廣王
從晉陽赴京師至郭外爾世隆以長廣本枝疎遠
政行無聞逼禪與廣陵王恭恭是莊帝從父兄也
正光中爲黃門侍郎見元義秉權政歸近習遂佯
啞不語不預世事永安中遁於上洛山中州刺史
泉企執而送之莊帝疑恭姦詐夜遣人盜掠衣物
復拔刀劒欲然之恭張口以手指舌竟乃不言莊
帝信其真患放令歸第恭常住龍華寺至是世隆
將謀廢立恐實不語乃令王所親申其意且兼迫
脅王遂荅曰天何言哉於是即皇帝位改號曰晉

秦黃門侍郎邢才子爲赦文叙述莊帝枉煞太原
王之狀廣陵王曰永安手剪強臣非爲失德直以
天未厭亂逢成濟之禍謂左右將詔來朕自作之
直言門下朕以寡德運屬樂推思與億兆同茲大
度肆眚之科一依恒式廣陵杜口入載至是始言
海內庶士咸稱聖君

徐孝穆使魏魏人授館宴賓是日甚熱主客魏收嘲
孝穆曰今日之熱當由徐常侍來孝穆從容答曰
前王肅至此爲魏始制禮儀今我來聘使卿復知
寒暑

北齊文宣每醉輒手殺人以爲戲樂楊愔乃簡鄴下
死囚置之仗內謂之供御囚開府叅軍裴謂之上
書極諫帝謂楊愔曰此愚人何敢如是對曰彼欲
陛下殺之以成名耳帝曰小人我且不殺爾焉得
名

張率年十六作賦頌二千餘首虞納見而詆之率乃
一旦焚毀更爲詩示焉託云沈約訥便句句嗟稱
無事不善率曰此吾作也訥慙而退

帝如洛陽詔親征高麗聞洛州刺史程名振善用兵
召問方畧嘉其才敏勞勉之名振失不拜謝帝試

責怒以觀其所爲名振謝曰疎野之臣未嘗親奉
聖問適方心思所對故忘拜耳舉止自若應對明
辯帝乃歎曰奇士也拜右驍衛將軍

徐敬業年十餘歲好彈射英公每曰此兒相不善將
赤吾族射必溢鎗走馬若城老騎不能及英公常
獵命敬業入林趨獸因乘風縱火意欲殺之敬業
知無所避遂屠馬腹伏其中火過浴血而立英公
大奇之

唐高宗幸東都時關中饑饉上憲道路多草竊命監
察御史魏元忠檢校車駕前後元忠受詔卽閱視

赤縣獄得盜一人神采語言異于衆命釋桎梏襲冠帶乘驛以從與之共食宿托以詰盜其人笑而許之比反東都士馬萬數不亡一錢

劉仁軌爲太子少傅少府監裴匪舒爲帝造鏡殿帝與仁軌觀之仁軌驚趨殿下曰天無二曰土無二王適視四壁有數天子不祥孰甚焉帝遽令別去初武后殺故后王氏淑妃蕭氏數見王蕭爲祟故多在洛陽不歸長安遂改洛陽爲東都至是以封禪車駕發東都至濮陽帝問左相竇德玄濮陽謂之帝丘何也德玄不能對許敬宗自後躍馬而前曰

昔顓頊居此故謂之帝丘帝稱善敬宗退謂人曰
大臣不可以無學德玄曰人各有能有不能吾不
強對以所不知此吾所能也李勣曰敬宗多聞信
美矣德玄之言亦善也

玄宗爲太子時王琚還長安選補諸暨主簿過謝太
子琚至廷中故徐行高視宦者曰殿下在內簾琚
曰何謂殿下當今獨有太平公主耳太子遽召見
與語琚曰韋庶人殺逆人心不服誅之易耳太平
公主凶猾無比而大臣多爲之用琚竊憂之太子
泣曰主上同氣惟有太平言之恐傷其意不言爲

患日深奈何琚曰天子之孝異於匹夫蓋主漢昭
帝之妹自幼供養有罪猶誅太子悅乃奏爲詹事
府司直

唐玄宗十三年張說以大駕東巡恐突厥乘間入寇
召兵部郎中裴光庭謀之光庭曰封禪告成功也
今將升中於天而戎狄是懼豈所以昭盛德乎說
曰然則如之何光庭曰四夷之中突厥爲大比屢
求和親而朝廷未許今遣一使徵其大臣從封泰
山彼必欣然承命突厥來則戎狄君長無不皆來
可以偃旗臥鼓高枕有餘矣說曰善即奏行之

蘇頌節度劍南值雋州蠻苴院與吐蕃共謀入寇頌
其間諜將吏請討之頌不聽移書還其謀曰毋得
爾苴院愧阻

李輔國久欲逼遷上皇會肅宗屬疾即詐言皇帝請
太上皇按行宮中太上皇至睿武門忽見射生官
五百遮道不得前太上皇馬驚幾墜輔國以甲騎
數十馳奏曰陛下以興慶宮湫陋奉迎乘輿還宮
中高力士厲聲曰五十年太平天子輔國欲何爲
者叱使下馬輔國失轡而呼曰翁不解事乃斬一
從者以徇力士向前曰太上皇問將士各好在否

可各納刀呼萬歲將士皆各納刀再拜力士復曰
輔國可御太上皇馬以行輔國乃與力士共執轡
御還西內居甘露殿侍衛數十皆廕老不堪太上
皇執力士手曰微將軍朕且爲兵死鬼矣自是快
快不豫至棄天下云

韓晉公滉自江東入覲氣槩傑出是時劉玄佐在大
梁倔強難制滉欲致其朝覲結爲兄弟升堂拜親
駐車三日大出金帛賞勞一軍爲之傾動玄佐敬
伏乃使人密聽滉滉夜問孔目吏所費多少詰責
頗細玄佐笑而鄙之

韓滉節制三吳所辟賓佐隨其才器用之悉當有故
舊子弟授之更無他長嘗召之與燕畢席端坐不
與比坐交言公署以隨軍令監庫門此人每早入
帷端坐至夕警察吏卒無敢濫出入者竟獲其力
韓愈爲吏部侍郎部有令史舊嘗關鎖不聽出入愈
曰人所以畏鬼者以其不能見也如可見則人不
畏之矣選人不得見令史故令史勢重若聽出入
則其勢自輕

寶曆中亳州云出聖水服之愈宿疾亦無一差者自
洛已來及江西數十郡人爭施金僦人使往汲以

飲之獲利千萬人轉相惑李德裕在浙西命于大
市集人置釜取其水同猪肉五斤煮云若聖水也
肉當如故逡巡熟爛自此人心稍定妖者尋而敗
露

李德裕爲西川節度使德裕至鎮作籌邊樓圖蜀地
形南詔吐蕃險要與習邊事者商議于中未踰月
皆若身嘗經歷

內謁者監仇士良請以開府蔭其子爲千牛給事中
李中敏判云開府階誠宜蔭子謁者監何由有兒
士良慙恚

嘗密令韋澳次州縣境土風物及諸利害爲一書
號曰處分語他日鄧州刺史薛弘宗入謝出謂澳
曰上處分本州事驚人澳詢之皆處分語中事也
唐池州人樊若水舉進士不第因謀歸宋乃漁釣于
采石江上乘小舟載繫繩維南岸疾掉抵北岸以
度江之廣狹因詣闕上書請造浮梁以濟帝然之
遣石全振往荆渚造黃黑龍船數千艘又以大艦
載巨竹絙自荆渚而下議者謂江濶水深古未有
浮梁而濟者帝不聽擢若水右贊善大夫先試於
石碑口移置采石三日而成不差尺寸

梁以王瓚爲招討使拒晉兵瓚爲治嚴令行禁止據
晉人上游楊村夾河築壘造浮梁饋運相繼晉副
總管李存進亦造浮梁于德勝或曰浮梁須竹竿
鉄牛石困我皆無之何以能成存進以葦竿維巨
纜繫于王山巨木踰月而成人服其智

安豐有陂縣叔敖所創爲南北渠溉田萬頃民因旱
多侵耕其間雨水溢則盜決之遂失灌溉之利李
若谷知壽春下令陂決不得起兵夫獨調瀨陂之
民使之完築自是無盜決者

晉王大敗契丹引兵躡之隨其行止見其野宿之所

布藁于地周環方正皆如編剪雖去無一枝亂者
嘆曰虜用法嚴乃能如是中國所不及也

莊宗一日大怒彎弓注矢射敬新磨新磨急呼曰陛下無殺臣臣與陛下爲一體殺之不祥莊宗大驚問故對曰陛下開國改元同光天下皆謂陛下同光帝夫同銅也若殺敬新磨則同無光矣莊宗復大笑

吳以徐知誥爲淮南節度行軍副使輔政初洪州進士宋齊丘好縱橫之術知誥竒之至是以爲謀主常引齊丘於水亭屏語或居高堂悉去屏障獨置

大爐以鐵箸畫灰爲字隨以匙滅之故所謀人莫知

魏寧以善推祿命徵爲館客武成以已生年月託爲異人問之寧曰極富貴今年入墓武成驚曰是我寧變辭曰若帝王自有法

韓熙載在南唐多置女僕晝夜歌舞語人云吾爲此行正欲避入相之命問何故避之曰中原嘗虎視于此一旦真主出江南棄甲不暇治不能爲千古笑端

周武於雪陽寢疾召姚僧垣赴行在所柳昂私問曰

至尊脉何如曰天子上應天心當非愚臣所及若
凡庶如此萬無一全

張全義爲河南尹東都荐經寇亂全義招懷流散勸
之樹藝出見田疇美黠麥善者親至其家賜之民
間言張公不喜聲伎見之未嘗笑獨見佳麥良繭
則笑耳由是比戶豐實遂成富庶焉

傳瓘與兄弟同幄行喪內牙指揮使陸仁章曰令公
嗣先王霸業將吏旦暮趨謁當與諸公子異禮
命主者更設一幄扶傳瓘居之告將吏曰自今惟
謁令公禁諸公子從者毋得妄入晝夜警衛未嘗

息

趙普與宋太祖大宴雨驟至上已不悅雨又不止左右皆恐普因奏言外間百姓正望雨時雨難得可令樂官就雨中奏樂上大悅乃終宴焉

戚里有分財不均者更相訟張齊賢曰是非臺府所能決臣請自治之齊賢坐相府召訟者問曰汝非以彼分財多汝所分少乎曰然命具款乃召兩吏令甲家人乙舍乙家人甲舍貨財無得動分書則交易明日奏聞上大悅曰朕固知非君莫能定也趙元昊反有詔削奪在身官爵募能生擒元昊者斬

首者卽爲節度使仍賜錢萬貫夷簡時在大名聞之驚曰謀之誤矣立削奏曰前代方鎮叛命如此誥誓則有矣非所以禦戎狄也萬一反有不遜之言得無損國體乎

天雄軍豪家芻蕘亘野時訪姦人穴官堤爲弊咸平中趙昌言爲守廉知其事未問一日堤潰吏告急昌言命亟取豪家所積給用塞堤自是不敢盜穴官堤爲姦

宋真宗天禧元年復召寇準入同平章準請間言曰太子人望所屬願陛下傳以神器丁謂佞人也不

知
卷一
可以輔少主上然之準乃屬楊億草表請太子監
國億夜屏左右至自起剪燭跋中外無知者既而
準被酒漏泄謂懼力譖準罷準爲太子太傅

王欽若爲亳州判官監會亭倉天久雨倉司以米濕
不爲受納民自遠方來輸租者倉米且盡不能得
輸欽若悉命輸之倉奏請不拘年次先支濕米不
拘朽敗奏至太宗大喜手詔荅許之因識其名任
滿入見擢爲朝官

王旦爲相時王欽若與馬知節同在樞府因奏事忿
爭真宗召旦至欽若猶謹不已帝大怒命付獄旦

從容曰欽若等恃陛下厚顧上煩譴訶當行朝
願且還內來日取旨明日召旦問之旦曰欽若等
當黜未知坐以何罪帝曰坐以忿爭無禮旦曰階
下奄有天下使大臣坐忿爭無禮之罪或聞外國
恐無以威遠帝曰卿意如何旦曰願至中書召欽
若等宣示陛下含容之意且戒約之俟少間罷之
未晚也後月餘欽若等皆罷

夏竦恨石介甚假稱介爲富弼說虜不從更爲弼往
登萊結金坑凶惡數萬人欲作亂請發棺驗視朝
廷復詔監司體量奉符提刑呂居簡曰今破冢發

棺而介實死則將奈何且喪葬非一家所能辨也
若人人召問之苟無異說卽令結罪保証亦可應
詔矣中使曰善還奏上意果釋

王文康公薛簡肅公俱嘗鎮蜀而皆有名章獻時同
執政一日奏事已因語蜀事文康曰臣在蜀時有
告戍卒反乃執而斬之于營門遂無事簡肅曰臣
在蜀時亦有告戍卒反者叱出之亦無事

程伯淳爲鄆縣主簿民有借其兄宅以居者發地得
藏錢兄之子訴于縣縣令曰此無證佐何以決之
顯曰此易辨爾卽先問其兄之子曰爾父藏錢當

幾何時曰四十年彼借宅以居又幾何時曰二十年即遣吏取錢十千視之謂借宅者曰此錢皆爾未借宅前數十年所鑄何也其人遂服令大奇之玄之曰如今民間尚藏有開元通寶不知當時何以辨

包孝肅公知天長縣有訐盜割牛舌者公使歸屠其牛鬻之既有告私殺牛者公曰何爲割某家牛舌而又告之盜者驚伏

宋哲宗時大藉民車又市易司患蜀鹽不禁欲盡入私井而輦解池鹽給之言者論二事如織皆不省

沈括侍帝側帝顧曰北邊以馬取勝非車不足以當之括曰車戰之利見於歷世然古人所謂兵車者輕車也五御拆旋利於捷速今之民間輜車重大日不能三十里故世謂之太平車但可施於無事之日耳帝喜曰人言無及此者遂問蜀塩事對曰一切實私井而運解塩使一出於官售誠善然忠萬戎瀘間夷界小井尤多不可猝絕也勢須列候加警臣恐得不足償費帝領之明日二事俱寢鄒浩在哲宗朝曾以上章諫立后削官及徽宗立浩還朝帝首言及諫立后事因問諫草安在浩對曰

已焚之矣退以告陳瓘瓘曰禍其始此乎異時
人妄出一緘則不可復辨也浩凡三諫立劉后隨
削其稿蔡京用事素忌浩乃使其僕爲僞疏言劉
后殺卓氏而奪其子欺人可也詎可以欺天乎徽
宗詔暴其事遂竄昭州玄之曰鄒浩若無後禍人
便以焚諫草爲美事乃知昨日所云是而今却道
非成案之不可拘如此

呂惠卿紹聖中復知延州道出西都時程頤居里中
謂門人曰吾聞呂吉甫未識其面明旦西出必經
吾門且一覘之迨旦了無所見詢之則已過去久

矣願嘆曰從者數百人馬數十能使悄然無聲馭
衆如此可謂整肅立朝雖多可議其才亦何可掩
也夏人復入寇將以全師圍延安惠卿脩米脂諸
砦以備寇寇至欲攻城不可近欲虜掠則野無所
得欲戰則諸將按兵不動欲南則懼腹背受敵留
二日即拔柵去

張浚次秀州嘗夜坐警備甚嚴忽有客至前出一紙
懷中曰此苗劉募賊公賞格也浚問欲何如客曰
僕讀書知逆順豈以身爲賊用特見爲備不嚴恐
有後來者耳浚下執其手問姓名不告而去浚異

日斬死囚狗衆曰此苗劉刺客也

趙開除成都路轉運判官凡元符至宣和所增塩額
列其次第謂之鼠尾帳揭示鄉戶歲時所當輸折
料等實數俾人人具曉由是鄉胥不得隱匿竄寄
趙開指陳摧茶買馬五害請依嘉祐故事盡罷摧茶
摧茶未可遽罷亦宜併歸轉運司痛減額以蘇茶
戶輕立價以惠茶商如此私販必衰盜賊消弭本
錢既常在而息錢自足朝廷是其言擢都大提舉
川陝茶馬事使遂大更茶馬之法官買官賣茶並
罷給茶引使茶商執引與茶戶自相貿易於是茶

引收息至一百七十餘萬緡買馬乃踰二萬匹

趙開於秦州置錢引務興州鼓鑄銅錢官賣銀絹聽民以錢引或銅錢買之凡民錢當入官者並聽用引折納官支出亦如之民私用引爲市於一千并五百上許從便增高其直惟不得減削法旣流通民以爲便初錢引兩料通行纔二百五十萬有奇至是添引至四千一百九十餘萬人亦不厭其多價亦不削宣司獲僞引三十萬盜五十人浚欲從有司議當以死開白浚曰相君誤矣使引僞加宣撫使印其上卽爲真矣黥其徒使治幣是相君一

日獲三十萬之錢而起五十人之死也浚稱善悉如開言

岳飛所將兵初過廬陵託宿壘市質明爲主人汛掃門宇洗滌盆盎而去郡守供帳餞別師行將絕謁問大將軍何在殿者云已雜偏裨去矣其嚴肅如此

畢再遇與金人對壘度金兵衆難與爭鋒一夕拔營去留其幟於營縛生羊置其前二足於鼓上擊鼓有聲金人相持數日及覺欲追之則已遠矣

遼蕭禧來理河東黃嵬地留館不肯辭曰必得請而

後反帝遣沈括往聘詣樞密院閱故牘得頃歲所議疆地書指古長城爲境今虜爭蓋三十里遂表論之帝喜曰大臣殊不究本末幾誤國事命以畫圖示禧禧議始屈

神宗熙寧七年

高麗致貢於金有司奏高麗所進玉帶石似王者金主曰小國無能辨識誤以爲玉耳

董搏霄磁州人至正十六年搏霄建議於朝曰海寧一境不通舟楫軍糧惟可陸運瀕海之人屢經寇亂且宜曲加存撫權令軍人運送其陸運之方每人行十步三十六人可行一里三百六十人可行

十里三千六百人可行乙百里每人負米四斗以
夾布囊盛之用印封識人不息肩米不着地排列
成行日五百回計路二十八里輕行一十四里重
行一十四里日可運米二百石每運給米一升可
供二萬人此百里一日運糧之數也

周文襄在江南久營綜精密人莫得欺給嘗爲冊曆
記日所行事及夫陰晴風雨之變畢具有綱運告
遇風漂米詰其日乃無風具伏其妄而民大小利
病得自言門無誰何一日有二尼詣公府上謁問
尼何自來曰自城南某山問手所携者何對曰尼

自作館孝順公笑受之問尼何需曰庵壞無從修
曰某所有廢材某所有竹木以丐若拜謝去

全寅山西安邑人少瞽而性聰警學京房易占斷多
奇中名聞四方正統間客游大同上皇旣北狩陰
遣使命鎮守太監裴當問寅寅筮得乾之初九附
奏曰大吉可以賀矣龍君象也四初之應也龍潛
躍必以秋應以壬午浹歲而更龍變化之物也庚
者更也庚午中秋車駕其還乎還則必幽勿用故
也或若應焉或之者疑之也後七八年必復辟午
火德之王也丁者壬之合也其歲丁丑月壬寅日

壬午乎自今歲數更九躍則必飛九者乾之用也
南面子衝午也其君位乎故曰大吉旣而也先復
入寇京師戒嚴寅時在石亨幕下召問休咎寅筮
之曰無能爲也且彼氣已驕戰之必克虜果敗去
踰年也先欲奉上皇南還時率以爲詐獨撫寧伯
朱謙上書懇請朝廷持不敢發寅力言于亨曰虜
人順天舉義我中國反失奉迎之禮獨不爲夷狄
笑乎亨遂與于謙協議遣使虜果奉乘輿來歸

黃文毅公孔昭爲南工部侍郎時廠中掘地得銅鼎
絲如玉公亟命工刻文廟宇賓國學文廟中中貴

聞欲以獻以廟器而止

嘉靖十六年阿向與土官王仲武爭田構殺仲武出奔阿向遂據凱口圍爲亂圍圍十餘里高四十丈四壁斗絕獨一徑尺許曲折而登山有天池雖旱不竭積糧可支五年變聞都御史陳克宅都督僉事楊仁調水西兵勦之宣尉使安萬銓素驕抗不法邀重賞乃行提兵萬餘屯圍下相持三月仰視絕壁無可爲計者獨東北隅有巨樹斜科偃蹇半壁間然去地二十丈許萬銓令軍中曰能爲猿猱上絕壁者與千金有兩壯士出應命乃鍛鉄鈎傳

手足爲指爪人腰四徽一劒約至木憇足卽垂徽
下引人人帶銃砲長徽而起候雨霽夜昏黑不辨
咫尺時爬緣而上微聞刺刺聲俄若崩石則一人
墜地骸骨泥爛矣俄而長徽下垂始知一人已據
樹乃遣兵四人緣徽蹲樹間壯士應命者復由木
間爬緣而上至圍頂適爲賊巡徽者鳴鑼而至壯
士伏草間俟其近揮劒斬之鳴鑼代爲巡徽者賊
恬然不覺也垂徽下引樹間人樹間人復引下人
纍纍而起至圍者可二三十人便舉火發銃砲大
呼曰天兵上圍矣賊衆驚起昏黑中自相格殺死

者數千人奪徑奔下失足墜崖死者又千人黎明
水西軍蟻附上固克宅令軍中曰賊非鬪格而擅
殺及黎明後殺者功俱不錄自是一軍解體相與
賣路走賊阿向始與其黨二百人免固營一空焚
其積聚乃班師而以三百官兵戍固月餘阿向復
糾爛土黑苗襲固盡殺官兵克宅欲勒兵勦之時
汝成以按察僉事飭兵思石聞之乃獻書于克宅
曰凱口餘孽復肆猖狂竊料今日賊勢與昔殊科
攻伐之策亦當異應往者一二梟獍負其窟穴草
竊爲姦者皆內儲糗糒外翼黨與包藏十有餘年

廼敢陸梁以延歲月今者諸賊以亡命之餘憂在
溝壑冒萬死一生之計謹呼而起非有旁寨渠酋
通謀結納擁羣醜以張應援也守彈丸之地跼伏
其中無異甕缶強升斗之糧躡尺五之道束腓而
登無異哺穀非素有紅粟朽貫積之倉廩廣蓄大
豕肥牛以資擊剝也失此二者爲必敗之形而欲
攝枵腹張空拳睥目而前以膺貔虎是曰刀鋸之
菟不足慮也然竊聞之首禍一招而合者三四百
人謂其十日之糧亦不下三四十石費亦厚矣而
逾旬不餒者無乃有間道捷徑偷輸潛輓以給其

中者不然何所恃以爲生也夫蠻陬夷落之地事
異中原譬之禦寇于洞房委巷之中搏擊無所爲
力故征蠻之畧皆廣列伏候扼險面趣高四塞以
困之謂之得地若我遜其險而彼乘其高順逆強
弱之勢已懸倍蓰是以諸賊雖微亦未可以蓐食
屠剪也惟在據其要害斷其芻粟之塗重營密柵
勤其間覘嚴壁而居勿與角利使彼進無所榮退
無所逸遠不過一月而羸疲之屍橐籥麾下矣若
夫我軍旣固彼勢益孤食竭道窮必至奔突則潰
圍之戰不可不鑒也相持旣久觀望無端我忽而

衰彼窮而銳或晨昏惰卧刀斗失鳴則刼管之虞
不可不備也防禦旣周奸謀益窘必甘辭納款以
丐殘息目前雖可妥帖他日必復萌生則拊撫之
說不可從也膚見宵人狃於詭道欲出其不意以
徼一獲彼旣鑒於前車我復襲其故轍不惟徒費
抑恐損威則偷固之策不可不距也茲數者雄畧
必有成算而疏腐之識敢效區區者休戚同情不
敢避越俎之嫌也至於事平之後經畫猶煩夫凱
口雖微以牂牁之巨阨也崇山密箐磴道迫脅兵
不得橫鉈人不得並躅乃遣一二眇小之官提數

一百不練之卒星散其間豈能持久往者廬山之變亦甚縱橫幸蒙前例刊木鑿竇夷其險棘開屯設所經營數年始得寧謐則今日凱口之議似不當出廬山之下也土官王仲武始以綿弱失其疆場頃蒙上官之力以保宗祧雖百口捐驅猶難報稱廼今哄然而稱逆者固其部落之遺也旣不能宣布德化俾彼投戈又不能率其左右心腹之雄先鋒効力是爲失職之臣與叛逆無異若復仍其名位錫之土田是右姦而獎亂也竊論此人當褫爵削籍移其族屬編之氓伍開設縣治衛以軍屯若

以勢有不行法姑稍假亦當暴其罪過聲諸市闌
重加懲罰庶威振恩覃協人心而伸國法也克宅
閱書不省集三司問計叅將李宗祐曰是未可以
猝破也曩賊負固久矣屢招屢叛徃以爲常故渠
魁無必死之心黨與有求生之望觀隙掩取以計
勝非力尅也廼今諸賊懲于剄衄之餘憤噪而集
死以待我我軍新罷負擔未弛勞勩未舒強馳而
起之氣鼓不作以棄死之虜乘強使之軍難以濟
矣克宅咲曰君何怯也吾將策一騎勒一人五日
而取之宗祐曰公言何易公獨不聞窮寇者勿逼

乎一盜橫戈于市卽萬人辟易非一盜能偶萬人
也必死與有生非偶也故利有所不角敗有所不
藥知彼知己百戰不毀乃今彼我不偶矣故曰是
未可以猝破也克宅曰兵貴拙速不貴巧遲故避
實擣虛藥勝者馳挫銳者披譬之破竹有餘刃矣
緩之賊且完壁儲餉益難爲功宗祐曰不然兵法
有之好謀而成攻敵無曠故將不可驕而勝不可
徇也蒲騷之役卒徇莫敖定陶之師竟驕武信公
欲以破竹之勢方之乎吾以爲未若強弩之末不
可穿魯縞也克宅艷然曰李君一何管蒯我也乃

強檄宗祐宗祐不得已以軍往賊果殊死禦我軍
我軍敗績賊遂擁宗祐去克宅大懼以千金賂賊
贖宗祐出之事聞克宅落職 勅安萬銓勦之萬
銓乃招阿向許以不死責王仲武均其田而亂始
息

朱勝金華人知吳郡事廉靜寡欲勤政愛人嘗曰吏
書貪吾詞不付房隸卒貪吾不妄行杖獄卒貪吾
不輕繫囚人嘆服之

一人處內不和唐一庵勸之居外有老僕問何故居
外便得和一庵曰其病根在此情狎則易遷凡人

之情令其可繼一時用得多便後手不來久則變
變則通所以自防者須各情各情者須踈迹

陳霽岩曰開州己巳年大水無蠲免而有賑濟府下
有司議予以州官倡議極貧穀一石次貧五斗務
令有餘俾沾實惠放賑時編號執旗魚貫而進雖
萬人無敢譁者予自坐倉門小棚執筆點名視其
衣服容貌暗爲分別貧之極次庚午春上司行牒
再賑極貧者書吏稟出示另報予云不必也第出
前點名冊中暗記極貧者逕開喚領鄉民咸以爲
神蓋前領賑時不暇粧點盡見真態再賑果皆極

貧不虛上惠耳

陳霽岩曰余在開州己巳之冬倉穀幾盡撫臺及各
州縣動支在庫銀二千兩糴穀比時穀價騰踊每
石銀陸錢各縣遵行派大戶領糴給價伍錢一石
每石賠已一錢耗費復得一錢災傷之餘民甚不
堪而入倉穀止四千石是上下兩病也余堅意不
領吏書稟余當受罰余不爲動後果被叅以灾年
僅免罰至庚午秋州之高鄉大熟隣境則盡熟穀
價減至三錢余方申撫臺動支銀二千兩派大戶
分糴報價三錢卽實予糴者三錢自後益減時價

至二錢四五分大戶以扣除爲請余笑應之曰寧
增穀莫減銀後自有用處也蓋比上年所買多穀
三千餘石而大戶無累賠反因以爲利報上司外
餘穀七百餘石則盡以給流民之復業者先是本
州土城十五里連年大雨灌注凡崩塌數十處庚
午秋當議填修吏請以鄉夫役余不許會有兩年
被災流民聞已處蠲荒糧思還鄉井因遍出示招
撫云亟歸種麥州有賑濟也乃出前大戶所糴餘
穀刻期給散另出四五小牌於各門一里外令各
將盛穀袋裝土到城上填崩塌處總甲於面上用

印倉中驗印發穀再賑而城已脩完有餘土矣流
民之復業者爭事種麥來春大熟皆不費之惠也
陳霽岩曰北方州縣惟審均搖爲治之大端三年一
審合一州八十八里之民庭集而校勘之自極富
至極貧定爲九則賦役皆準此而派區中首領有
里長老人書手官惟據此三等人三等人因得招
權索民財物置之又茫無憑據余到任輪審均徭
尚在一年後乃取舊冊查自上上至下上七則戶
照各里開填分作二簿每日上堂輒以自隨或放
告或聽斷或理雜務看有曉事且樸實者出其不

意喚至案前問是何里人就摘里中大戶問取家
道何如比年間何戶驟富何戶漸消隨其所荅手
註簿內如是數四參驗之所荅畧同又一日點查
農民本州槩有二百餘人卽閉之後堂各給一紙
令開本里自萬金至百金等家嚴戒勿欺彼各有
身家前程自不敢欺也又因 聖節先揚言齊點
各役至期拜畢卽喚里老書手到察院分作三處
各與紙筆令開大戶近年之消乏者或殷厚如故
不必開也以上因事採訪編成底冊臨審時一甲
人齊跪堂下余自臨視擇其中二三鍊實人作爲

公正與里長同舉大戶應升應降者諸人知底冊甚明咸以實舉遂從而酌驗之頃刻編定一日審四五里往往州官待百姓不令百姓候州官也

陳霽岩曰余知開州時俵馬以高三尺八寸齒少而形肥者爲合式各州縣無孳生駒必從馬販買解在有司調停何如耳開州居各縣之中馬販自外來先被各縣攔截買完然後放過州官比解嚴迫馬頭枉受鞭笞馬價騰踴求速反遲予知之故緩其事待馬販到齊方出示看馬先一日喚馬頭到堂面問之云各縣俵馬已行汝知之乎咸叩頭應

曰知之又密諭云我心甚忙明日看馬只做不忙
汝輩宜知之又叩頭感激而去明日各馬販隨馬
頭帶馬有高至四尺者予輒置不用曰高低怕相
形寧低一寸我有稟帖到太僕寺只說是孽生駒
耳衆稟再遲三日至臨濮會上貿易得予卽許之
不責一人而出各馬販氣索然爭願賤賣在他縣
有索銀三四十兩者在本州僅得二十餘兩一兩
日卽完矣他縣有定限高馬刻期早解以求保薦
馬價騰至四五十金至斃二人於杖下者此公竟
不求天道固可畏也

陳霽岩曰獄訟有五聽之法至審強盜一出入關
係甚重尤宜加意詳鞠不必驟用重刑余嘗審得
賊首王和尚攀出夥盜有多應亨多邦宰者驍悍
倍於它盜招服已久忽一日應亨之母從兵道告
辨一紙准批下州中引王和尚爲証予思之此必
王和尚受財許以辨脫耳乃於後堂設案卓卓圍
內藏一門子喚三盜俱至案前覆審預戒皂隸報
以寅賓館有客余卽舍之而出少頃追還入則門
子從卓下出云聽得王和尚對二賊云且忍兩夾
棍保爲汝脫也三盜皇遽叩頭請死又有一盜翟

知府品 卷一
姓者家頗能自給因醉爲羣盜所誘明火執杖分
得梭布褶一件失主以爲賊盜爭爲已物余令各
報原裁縫名下午取到令庫吏另覓梭布褶一樣
兩件插和賊賊置于堂上令失主裁縫自認至賊
賊遂云此吾製也賊始駭服

陳霽岩曰楚屬最廣文移極多初到任時江夏縣送
進文書千餘角書辦先將照詳照驗分作兩處余
夙聞前輩云前道有駁提文書難以報完者必乘
後道初到時賄囑吏書從照驗中混繳余乃費半
日工夫將照驗文書逐一親查中有一件駁提該

吏者混入其中先暗記之命書辦細查戒勿草草
書辦受賄逕以無弊對就摘此一件面質之重責
三十板問罪革出學道書辦頂首銀四百兩被革
者分文無與奸胥每日跪門哀告徧求兩司諸公
代言姑准令自覓頂而革其役後來照驗文書發
辦對查一不敢隱弊遂絕耿天臺這門生劉守魯
來弔托問前事摘發何神余對以舉一之不可測
而已

沈介庵爲衡州二守時會各寺觀書院與諸生譚學
一日有生員數人蓋於諸生中稍出色者來謁留

坐稍久卽有同類妬之每揭無名謗書於會所前
數人者來告曰此係某之所爲介庵曰可恨哉吾
子言之若何數人曰其上化之化不可得速加刑
焉介庵笑曰不教而殺爲虐還且教之乃遣吏一
人往某某之家曰請明日會某處講學如不來我
先責汝吏突入其家喻以請意甚切某某無所辭
次日乃到衆人俱目攝之甚怒介庵獨呼某某前
問近日工課何如詰以學旨有能達不能達者更
爲講解前數人不解所以愠而問故介庵笑曰彼
人從今不揭汝矣此正子所謂化之也諸生退是

後果無粘謗書者

樊升之曰夫子曰今由與求也可謂具臣矣夫由之果求之藝此亦天下之上能也而何以爲具以言其酬酢庶務裁決當機非不恢恢有餘至服遠人守邦國則不足故曰具者備也言備一時之用不可少也然則後世雖有果如由藝如求者亦止可稱具矣而況于斗筭之材哉雖然言有斗也必有斗之用也言有筭也必有筭之用也故尺寸之長襍線之伎皆得效用而後天下無棄才與人盡弘恕故曰君子易事然則斗筭之人不足筭也而

足牧也詎可忽諸

